

Oz è igl De mundial digl teater



Igl De mundial digl teater

Ast te er gio santia la construcziun: «Cala da far teater!»? Forsa tgi igls ties genitours u la tia scolasta on detg chegl eneda, cura tgi te ast fatg da chegl tg'ins duess betg far ... Per exaimpel cura tgi te ast fatg da clown! Igl 27 da mars ast te ena bunga stgisa per far teater scu tgi te vot. Te post deir: «Bagn, oz fatsch ia teater! Igl 27 da mars è numnadamaintg igl De mundial digl teater.» Chel de mundial dattigl davent digl 1961, siva tg'igl institut da teater internaziunal ò proclamo el. Managea cun teater ègl cò igl gi da rollas, damai persungas tgi gioian otras persungas per rachintar en'istorgia sen ena tribuna. Chella furma da divertimaint dattigl gio da mellas onns. Igl vigls Grecs on


gio giuia cumegias e tragedias. Cumegias èn tocs divertents, tragedias loancunter èn istorgias trestas tgi fettan mal. Igl actours purtavan mascras per giuier las differentas rollas. Egn digls pi famous autours da teater è sto igl scriptour engles William Shakespeare. El ò scretg per exaimpel igl teater «Romeo e Giulietta», l'istorgia da dus inamuros tgi dastgevan betg neir ansemen, perchegl tgi lour famiglias vevan dispeta l'egna cun l'otra. Shakespeare ò scretg igl toc avant ple tgi 400 onns ed igl tema scu er igl teater scu tal, èn anc adegna actuals. Teater para damai da fascinar igls carstgangs, tutteguna cura e noua sen chest mond.

Ast te gio vurdo eneda en teater?

Dattigl igls 27 da mars en teater per unfants ainten la tia regiun? Tschertga aint igl internet e vo a vurdar el!

Tge teaters ast te gugent? Teaters cun puppas, cun mascras u cun dretgas persungas?

Fast te tezza/tez gugent teater?





Faschagn teater

1

Applaus


La grupp d'unfants tschainta giumez e varda vers la porta u vers la tenda. En unfant aintra u vign davant la tenda. Ella u el aintra tot normal, cun en nas cotschen u cun ena mascra. La grupp d'unfants (igl public) fò applaus. Siva tg'igls unfants on applaudia, fò igl unfant ena reverenza/ en anclegn e tschainta dasper igls oters unfants. En oter unfant aintra cun u sainza requisit e la grupp applaudescha. Uscheia vogl anavant, anfignen tgi mintga unfant ò pudia galdeir igl applaus e far en anclegn.



Pantomima

En unfant tscherna en animal u ena tgossa e preschainta la rolla tscharneida sainza discorrer u far ramours. Igls oters ston angivinar tge tgi è managea. Er pussebel: far pantomima da mastiers.





Rentg d'emoziuns

La grupp stat an en rentg. En unfant dat anturn en'emoziun. Mintg'unfant dat anavant chell'emoziun alla vashigna u agl vashign. Uscheia vogl eneda anturn, anfignen tgi l'emoziun reiva puspe tar igl unfant tgi ò scumanzo. Ossa vign igl proxim unfant londerve. Variantas per mussar l'emoziun: en'exclamaziun, mussar l'emoziun angal cun la mimica, cun muvimaints, scu igls animals, liun = curaschous, tgang = cuntaint, cot = losch, meir = timida, etc.

Liger la gasetta


En unfant stat d'ena vart dalla stanza, cun igl dies anvers la grupp, e ligia la gasetta. Igl rest dalla grupp è dall'otra vart dalla stanza e tscherna en'emoziun (u en animal). Cun chell'emoziun antschevan els oss a sa muantar plang vers igl unfant tgi ligia la gasetta. Chel sa volva e la grupp stat eira immediat. Sch'igl unfant dalla gasetta angivigna da tge emoziun tgi sa tracta, vignigl mido rolla, schiglio ligia el anc eneda la gasetta e la grupp s'avischigna puspe.

Tgi sung ia?

Or d'ena chista cun vistgadeira, requisits e mascras per sa travistgeir peglia en unfant treis tgossas e las teira aint. Ella u el sa preschainta davant la gruppa d'unfants e gioia ena persunga u en animal u ena figura or dad en'istorgia u en film. Igl's unfants ston angivinar la rolla digl unfant. Tgi tgi angivigna andretg, dastga sa travistgeir scu proxima u proxim.

Mascras

Zamberge mascras da differents animals or da plats da cartung e giuie, scu tgi chels animals festive-schan ansemen.





Ainten en restorant

Giue ena scena ainten en restorant.

En unfant è igl giast, en oter serva, en terz è igl cuschinier u la cuschiniera u ensatge oter. Invente anc duple rollas e giue las differentas variantas:

- Igl giast posta spaghettis, ma survign en pesch ...
- La cuschiniera ò en'assistenta u en assistent tgi metta aint sal ainten la crema da vaniglia anstagl da setger ...
- La cameriera maglia sezza nov chicken nuggets ed igl giast survign angal ple en chicken nugget ...
- Invente atgnas scenas!